

Obraćanje visokog predstavnika Komitetu za politiku i sigurnost EU

Visoki predstavnik i specijalni predstavnik Evropske Unije Paddy Ashdown se danas u Briselu obratio Komitetu za politiku i sigurnost EU. U svom govoru, visoki predstavnik je naglasio imperativni zadatak borbe protiv organizovanog kriminala u BiH, kao i u cjelokupnom regionu. Organizovani kriminal danas predstavlja ozbiljnu prijetnju za budućnost ovih zemalja, odnosno njihovoj perspektivi za uspješan proces tranzicije, kao i za bezbjednost i blagostanje Evropske Unije. "Moramo savladati problem organizovanog kriminala zbog dobrobiti naših vlastitih zajednica, te zbog toga što bi nepoduzimanje mjera na njegovom zaustavljanju dovelo do podrivanja svega onoga što smo do sada postigli u BiH i u regionu," rekao je visoki predstavnik.

Jedini način da u tome budemo djelotvorni jeste da se neposredno uhvatimo ukoštac sa uslovima koji omogućavaju širenje organizovanog kriminala: slabe i fragmentirane institucije; rasprostranjena siva ekonomija i meke granice unutar regiona. Zasigurno je da uspješna borba protiv organizovanog kriminala ovisi o policiji, međutim za tu borbu su neophodni i dobri zakoni, dobre sudije, tužioci i zatvori. Visoki predstavnik je ponovio da uspostava vladavine prava mora biti prioritet adekvatno izražen i u saradnji između zemalja u regionu i Evropske Unije. "Moramo prihvatiti činjenicu da su za postizanje pravde potrebna značajna finansijska sredstva, međutim s tim u vezi sa sigurnošću tvrdim da će izdaci poreskih obveznika na Balkanu i onih na ulicama naših gradova biti manji od cijene koja će se platiti ako se organizovanom kriminalu dozvoli da dovrši svoj mračni projekat preuzimanja kontrole nad BiH," rekao je visoki predstavnik. Visoki predstavnik je s tim u vezi naglasio

važnost EUPM i potcrtao da će misija na koordiniran način skoncentrisati sve svoje snage na rješavanje problema organizovanog kriminala.